



Syt 75 Joor uff dr Route

Prolog vom Kloschterräbe Källergaischt

*I ha ghofft als Gaischt do im Egge unde
Haig i mi ewigi Rueh ändlig gfunde
Doch zem 75schte het die Clique gsait «mir häns»
Dä Moderhuffe kennt ebbis due fir si Residänz.
Kumm emol fiire vo deert unter dr Bangg
Und bricht ebbis vo alte Sujets, als Dangg.
So han i mi Hirni miesse gwaltig strapaziere
zem eich us em Zeedelfundus ebbis z rezitiere.*

1999 (50 Joor Ruggblig)

Wil kain vo däne «Senne»
Het drumme oder pfyffe kenne,
hän Maa und Frau (oo pfui und gruusig!)
gsait mer machen e Waage-Guggemuusig!
Dasch **anno 1949** gschee.
Was bliiben isch, kasch hit non gsee.
Als Clique hän si sich persee.
dr Namme Kloschterräbe gee.
Numme drey Joor lang isch die Gugge
An d Fasnacht gogen «ummejugge».
Doch uff aimool hän die Gselle
nimme Tuba bloose welle,
us Fuulheit hän si gsait: C'est chic,
miir wäärde jetz e Waage-Glyygg.

1955 - s Zitterbriggli

Bisch du pressiert und bisch im Drugg,
gang nur nie iiber d Dalbebrugg,
jo nit wenn s schtirmt und g Witt'ret.
S isch gruusig, wie si zitt'ret.

1970 - Protäscht!!

All Joor wenn d Fasnacht ummen isch,
liisich in jedem Zyttigswisch, was alles z kritisiere sey,
und jedes Joor heersch s glyychi Gschrey
-au d Glygge gänn drzue dr Säge –
An allem d'schuld sinn d Fasnachtswäge!

1971 - 3000 Joor Bahnhof-Fassade

Sogar am scheenschte Frieligsdag
wenn d Sunne langsam wiider mag,
denn schtoot als schuurig Bild – wie z laid –
dr Bahnhof do und nimmt dr Fraid.
Dä fin-de siècle Jammerkasschte
duet s Basler Image stargg belaschte,
denn s Ganze isch däm Architegg
ganz aifach grindlig abverreggt.

1974 - Adie Zitterbriggli

Wo mir vor nynzää Joor am Rhybord unde
die Zitterbriggliwärs gebore hän,
hätt s nit emol dr Uri Geller uusegfunde,
dass si hit nonemol e Sujet gän.
Denn das ka ain schon no erbittere,
wenn s haisst, die Wägwärffbrugg nutzi kai Drägg,
si sey defäggt und syg jetz uss mit zittere.
Kurzum, die Dalbebrugg, die miess ewägg.

1988 – Em Bebbi syyny Draim

Me draumt vo Brugge wo nit zittere
und gwaggle wenn s duet gwittere.
Vo Brugg-Drain wo nyt dein koschte
und au nooch hundert Joor nit roschte.
Vo Albdraim wäg de Zolli-Affe
wo au no uswärts wänn go schaffe.

2007 – 100 Joor scho Düü-Dää-Doo

Vom Gotthard dr letschti Postillon,
het vor 100 Joor gsait:»Y will mee Loon«.
Er isch schuerstraggs noch Bärn zem Gyygi
Und frogt en eb mee Loon drin liigi?
Dä sait wie immer y weiss nit
und frogt dr Merz obs mee Koole git?
No drey Joor het dr Postiloo z Airolo
En Antwort griegt, es gäb kai Gulolo,
doch er kenni, statt mit 6 Haaber-Motore
mit em e Autobus iiber d Alpe pfoore!

2012 – Wiirsch nass in dr Oggsegass

Uff dr Dachterrasse filmt s Färnsee die gueti Frau.
Dr Reporter frogt si:»was isch gschee ganz genau?»
«Luege si, do unde steen ständig die Schnalle.
Mir kemme kuum me ins Huus, das leen mer is nimm gfallte.
Denn hogge si au no in d Bluemerabatte
wo unsre Abwart so pflägt und im Frielig duet spatte.
Mit däm Schluuch han i nur miesse aabespritze,
jetz sin die Schnätteree ewägg, sich aifach Spitze.»

Epilog

*So - erfillt hätt I dermit mi Pflicht
und iir wisset e Bitz mee vo unserer Gschicht.
Zum Jubiläum wünsch i däre Kloschterräbe
dass si no vvyli Joor duet wyterlääbe.
Jetz isch aber Zyt, dass i wiider verduft
unter die hinteri Bangg in mi Gruft.
Doch zerscht muess i no schnäll e Stange kippe,
dass si nit verroschte, mini Rippe.
I hoff das isch nit z draischt.
Also sali zämme – Eire Källergaischt*

Bsuech is au uff www.kloschterraebe.ch

*D Ladäärne-Uusstellig uff em Minschterplatz und d Waage- und
Reggwisyte-Uusstellig bi dr Kasäärne sin vom Määntig znacht bis
am Mittwoch demoorge! Deert und an de 3 Verkaufsständ (CINS)
in dr Stadt ka men au alli Zeedel und Schnitzelbängg, d Blaggedde
und dr Rädäbäng kaufe.*

*D Zeedelläasete isch am Sunntig no dr Fasnacht 2024 am
25. Hoornig, vom Fimfi bis am Siibeni zoobe, in dr Baseldytsche
Bihni (im Lohnhof 4). Dr Ydritt isch vergäabe.
D Foyer-Baar isch vom Vieri ewägg offe.*

Drugg:

OKT Offset- und Kopierdruck AG, Münchensteinerstr. 136, 4053 Basel